

## Charakter-Köpp

Text: Robert Pütz Musik: Jürgen Fritz

De Huck, de Nas, de Lippe  
De Brüssjer un de Fott  
Wat hängk muss widder stippe  
Wat wabbelt dat muss fott

Lück loßen sich all lifte  
Vum Asch bis an d'r Kopp  
Och wenn se donoh ussin  
Wie en verblötschte Barbie-Popp

Do weed jetrocke un jespant  
Do weed affjesauch un opjespretz  
Verjrössert un verkleinert  
Jebotox jede Ritz

M'r luure uns em Spejel an  
Sin stolz op all die Falde  
Die hammer ehrlich uns verdeent  
Die wolle mer behalde  
Mir han Charakter-Köpp  
Nur dodrop kütt et an  
Do jitt et nix ze lifte  
De Falde blieven dran

Falde öm de Aure  
Falde op d'r Steen  
Falde och am Föttche  
Dat han de Lück nit jän

Vum Falde usszebüjele  
Lääv en ganze Industrie  
Doch jlatt wie su ne Kinderpopo  
Weed ding Huck nie mih

Do weed jetrocke un jespant  
Do weed affjesauch und opjespretz  
Verjrössert un verkleinert  
Jebotox jede Ritz

M'r luure uns em Spejel an  
Sin stolz op all die Falde  
Die hammer ehrlich uns verdeent  
Die wolle mer behalde  
Mir han Charakter-Köpp  
Nur dodrop kütt et an  
Do jitt et nix ze lifte  
De Falde blieven dran

SOLO

Do weed jetrocke un jespant  
Do weed jeklammert un poliert  
Wenn dat komplett donevven jeit  
Dann weed prozessiert

M'r luure uns em Spejel an  
Sin stolz op all die Falde  
Die hammer ehrlich uns verdeent  
Die wolle mer behalde  
Mir han Charakter-Köpp  
Nur dodrop kütt et an  
Do jitt et nix ze lifte  
De Falde blieven dran